

沅  
湘  
耆  
舊  
集

沅湘耆舊集卷第一百十六

新化鄧顯鶴湘臯編輯

長沙毛國翰青垣校訂

段判官紹恭

四首

紹恭字敬之茶陵人乾隆丁酉拔貢山東高唐州  
州判先生與先叔父同官山左氣誼甚合有送鉅  
野君出塞詩四首余幼時曾見其手書大橫幅每  
一披誦輒爲泣然謹採入是集蓋不獨存其人亦  
以見當日公論如此不容誣也

送鉅野大令鄧璧園二兄謫戍伊犁

黔川六載緇銅符循吏由來本碩儒政拙催科宜下考邑

當屢歉更多虞按鉅野連年饑歉盜劫案最型方不愧真  
君子除弊能蹤古丈夫魯柝何緣經耳熟官僚相接等聞

邾

撫字勞勞願莫酬黃紬被底不勝愁醫瘡無計彌天庾束  
帶何能謝督郵行矣風波真莫測壯哉雀鼠又何尤遠疆  
尙欲涓埃効塞草荒荒太漠秋

臨行父老擁征驂直道斯民有是非此事只當莫須有生  
還齊祝送將歸丁年意氣心猶壯丙舍松楸淚欲揮惟孝  
惟忠兩期盡先生顏面絕幾微

短衣匹馬劇駸駸古戍蒼涼鎖苦吟厚譴敢嗟臣命薄輕  
裝還載 聖恩深雲屯大漠春風遠日落中原暮氣沈萬

里不辭班定遠書生尙有濟時心

鄧教諭枝麟六首

枝麟字翰伯號南坡寧鄉人乾隆丁酉拔貢官乾  
州廳教諭著有海粟園詩稿八卷

懷湘曲

江雲淦淦芙蓉老合沓寒波飛素縞橫蛟穩臥碧潭澄一  
聲鷓鴣江天曉揭車香歇蓼花洲冰絃撥動古時愁蒼梧  
雲去牀琴冷紅雨亂點湘波流蕙櫂蘭橈封煙霧珠旗黯  
澹雲中路天樂無聲寡鳳排哀猿嘒徹黃陵樹

秦人洞

長城萬里白骨朽秦人半死獨夫手侯生已去盧生還避

世猶有桃源叟花開花落幾經春山洞幽深不見人川原  
十里紅如錦卻許漁郎來問津望夷宮中胡亥死英雄逐  
鹿紛紛起漢家伏臘四百年深山歲月長如此我來躡屐  
緣蕪中種桃人去煙濛濛一聲長嘯振林木溪邊笑殺桃  
花風

天心湖

浩浩接穹蒼平湖望渺茫鼉鼉吹浪白蘆荻受霜黃遣悶  
歌三疊懷人水一方何當深夜月來照米家航

登岳陽樓

一棹信春風樓高四望通登臨吾輩晚憂樂幾人同岸影  
長天外湖光返照中憑欄發新咏渺渺思無窮

新野縣

吾家發迹地今作異鄉遊竹帛思明德悲歌弔古丘  
疆連三楚近河繞一城幽獨醉新豐酒何人識馬周

酉港遇龔荻浦編修

我向五溪去君從百粵回相逢湖上雨已放歲前梅  
歸雁衝風急閒雲傍岫開何時依玉署莫滯揆天才

楊簡州瓊一首

瓊字叔玉新化人乾隆丁酉拔貢初官龍陽教諭  
以軍功升四川西充縣知縣擢簡州知州刺史多  
聞好善爲北渡諸楊之雋居官廉謹權涪州牧時  
忽一日杖殺爲民害者三人眾皆危之總督蔣公

攸銛獨稱其能擢西陽直隸州未赴任遽引疾歸  
築息園吟嘯其中頗得林壑之趣屢屬其子業治  
拉余往遊卒卒未果而刺史已歸道山矣詩不多  
見茲所存一首往歲嘗聞之先友譚吾肩者亦可  
見其風概

書西充聽事

化民以德莫如猛好官不過多得錢古來能吏只如此世  
上勞人真可憐白日放衙誰諒我青山歸臥是何年黃綢  
被裏難安枕輸爾茅簷自在眠

李廷實冕一首

冕字冠山宜章人乾隆丁酉拔貢

土木行爲鄺忠肅作

司禮監天下亂雨帝謠星辰變  
武刺入寇邊廷驚逆璫建  
議上北征西甯覆師武進沒  
車駕疾驅懷來城誰道腐儒  
不識兵也先來上皇去微臣  
不足惜君王在何處吁嗟乎  
闕官自古亡人國東做西做  
尙接迹

王選貢崇綱

三首

崇綱字立堂安化人乾隆丁酉拔貢有西蜀紀行  
詩草

武陵舟中

曉發鼎州棹乘風事遠遊  
眼迷枉渚色心逐大江流  
沅澧多香草風波有狎鷗  
飄飄何所極吾道一虛舟

渡口望荊州

斜陽明滅盪孤舟，滿眼風光萬里浮。  
隱約帆檣出巫峽，微茫煙樹辨荊州。  
版圖四塞雄天險，戰壘三分踞上游。  
此地自來稱重鎮，浩歌何處弔孫劉。

秋日登合州城樓示同遊諸生

斫地放歌莫哀吟，登高重上舊樓臺。  
聽殘巫峽猿初歇，望斷衡陽雁不來。  
終古霸圖空復爾，大江秋氣實悲哉。  
孤城暝色情何極，與爾臨風問酒杯。

舒判官正載

十七首

正載字西樵，溆浦人。乾隆丁酉拔貢，以四庫館議敘官荊門州、隨州州同、沔陽州州判。有竹根書屋。

詩集西樵官湖北久嘉慶初教匪起當陽連年用  
兵西樵身任行閒蒿目時艱時形歌詠今擇其有  
關時事者存之

自述

家住五溪深氏族頗蕃衍代有讀書人宦遊亦不遠居貧  
暴客稀村落安雞犬舌耕備餽粥手澤憑舒卷以此爲世  
業左道吾知免

隨棗從軍雜詩

飛書嚴堵禦里長爭傳宜漢東古大國豪俠多少年出錢  
製軍裝器械盡完全誓當滅此曹不惜身家捐旦日鼓譟  
出煙霾蔽長天

官兵駐襄棗威望稱將軍步兵萬爲伍馬甲千成羣開濠  
建高壘帷幕秋雲屯探馬如梭織驚詫了不聞 至尊厯  
宵旰千萬糜帑銀不惜餽牽竭還聞錫賚頻諸將皆晉秩  
何時奏殊勲

驅馬向鄢郢乳燕巢林木日暮不見人羣犬嗥破屋呼僮  
擊石火持米思作粥無復得鬪鎗米生不能熟囊囊乾餓  
空一飯難接續居者無完椽行者但枵腹

匪徒再三擾憤悲不聊生婦苦不得織男苦不得耕壯士  
盛意氣懷抱爲不平明日相糾約赴賊與鬪爭手刃數賊  
死身傷命亦輕班隨多義勇不能悉其名偉哉羅武舉負  
氣貫雷霆

襄陽武舉羅相陳  
隨官殺賊陣亡

軍中重嚮導卽用彼鄉人不問平生業但入行伍羣記路  
如老馬認賊如所親連騎偵探回瑣屑輒面陳主將動顏  
色甄拔出風塵授以行營職光輝照比鄰昔爲一厯氓今  
隸師武臣借問毛穎傳何如賦從軍

王師旣勞瘁賊勢亦衰颯畏死欲生降懼罪恐不納旦示  
懾伏情宵遁忽紛沓官軍未及追曉劫肆摧拉獬狗昧死  
生防閑幸周匝

哀劉參將

有引

劉名錦麟漢軍人德安營參將孝感胡家寨賊起劉帶  
兵前往時湖南苗疆用兵德安營皆在調參將兵新募  
入伍又軍械多新製不中用援兵後時不至遂陷時丙

辰五月十七日也

牙璋起南服丹浦發幢輶羽書籍三屬飛鱸輓五兵平林  
甲南郡壯士遠出征潯川孝子思梟獍忽夜鳴五溪滯還  
轅九嶷愁鳴鉦百金造火礮萬錢募新丁新丁不解戰火  
礮苦未精王將奮擊賊慷慨遂捐生投死良可憫天怒激  
爲霆復讐爲匹夫况乃在虎臣機槍誓掃除肘腋帖不驚  
旣俾黔黎甯庶令公憤伸

丙辰七月七日舟發潯水

有引

時賊匪竄鄆郢間各軍鎮進兵勦捕德安郡守至漢東  
邊界防堵且督糧糈余奉檄勦事由水路往感而有作  
立秋越三日扁舟發潯水挂席何所之漢東詰紆沔患

斯已清民居獲生理我稻以時刈我室葺其燬所幸歲豐  
登民業安耘耔嗟彼豺狼性竄逸同狂兇焚掠靡弗至自  
取誅戮耳千里急徵調軍興豈得已緩師非養寇不忍速  
其死可憐孤與嫠傷竄難屈指或且多脅從罪名難概擬  
側聞寬大詔潢池亦赤子與以自新路俾之安井里吁  
嗟此羣生良莠知凡幾所重民司牧教養視所以誰爲挽  
天河甲兵願一洗

自襄棗返鍾祥舊營途中卽事

有引

丙辰秋仲賊於鍾祥地方被官兵圍因夜遁西竄凡前  
所焚掠復被蹂躪官兵追及之處斬首無數正載時由  
此路返老營將徹糧臺輒有是作

杖策尋歸路疲馬向晚鳴天高星暗澹樹影潛流螢行行  
度荒塍悄悄聞人聲驚定互問答邀我來柴荆草草謀一  
飯粗糲勝細精慰勞前致詞客行遠從征昨日此山中四  
面皆賊營孤燈照壞壁永夕心怛怛

孝犬詩

有引

余世居竹坳邇來人安生業風俗復古族子台居貧食  
力其從父某貧而瞽以傭春爲業老更衰憊台曰吾幼  
不能事父母今一同堂叔父而不能養人其謂我何於  
是招與同居甘苦與其先是鄰舍姪泗家畜牝犬生數  
子台從泗乞其一旣長大猶識所生數歲牝犬老且病  
臥牆下台每食飼犬犬食將竟必大嚼而奔初不覺也

村中諸兒嬉戲狎見犬奔而至病犬食其唾皆拊掌笑  
曰是犬又送飯來也以問台始知其爲母子狗鄉人來  
述其事作孝犬詩

鄉人里中來爲我述家常言我里中子至性可憫傷煢煢  
老諸父奉侍如爺孃伏臘具雞黍蔬藿勝膏粱親戚無閒  
言鄉黨稱爲良以此孝友心和氣乃致祥鄰舍家生獨乞  
歸一握長餒餓漸長成狺狺聲滿堂母子接踵返奔突隔  
重牆亦知顧復恩尾追如狺狂嗅喉搏毛骨抱持昨蠱蠱  
數年牝狗病骨瘦肢足僵獨也顧視閒意若含悽愴鄰舍  
家益貧無益兼無糧貽羹亦有術物曲信難量以此報所  
生乃類烏與羊里人親見之爲我述其詳聞罷長太息此

沙洲耆舊集 卷之二十一  
事當闢揚爲詩寄里門俚歌愼忽忘

按吾兄雲渠先生亦有孝犬記與此事絕類又有義犬記均見聽雨山房文集嗚呼犬猶如此可以人而不加乎

決隄行 有引

嘉慶二十三年六月初六日襄水泛漲衝潰天門縣濱江之白沙灘上十三垸民決李家橋橫隄以致下游七十二垸被淹因而天門上三十六垸民人遂以十三垸人決堤放淤貽害舉火焚其廬舍凡三處逾百家報官構訟謹案七十二垸淤生升科以來地本低窪屢被浸灌業民控十三垸者不一往年旣以三閘不能酌暢開程文吾口因隄口溝水深沙淤流走難以築閉劉天祿

口則溝路盡已淤成高阜距湖益遠蕭家口近湖傍隄  
尚有溝路中亦淤長數里費用頗繁天門圩業欲於漢  
川楊贊口開隄放水以其地距所屬白西等團甚近人  
之自便其私固亦情所應有而楊贊口隸漢川其隔岸  
諸垸盡屬漢川良田於是漢川令以向來止就沔陽所  
屬三開三口開放爲詞當事亦以爲然民既屢訴官亦  
屢勘頻催而議終未決因有拘項聞蕭家溝明口之檄  
所以急民事也正載奉檄督辦以正月二十二日鳩工  
三月初十日築口因有是作

天門橫隄夜被決七十二垸皆魚鼈建領下注千頃陂無  
復田疇露畛畷一家畎瀆食放淤一家阡陌成江湖從此

兩家甚怨毒以火報水焚其廬居人遠屬烟氛惡里長長  
呼驚膽落桃人茅馬么麼興掉弄潛飛如戲謔垵南垵北  
夜捉人兒唬女哭吏怒嗔花縣松廳未了事稱晴道雨時  
復論漢川縣屬楊贊口天門欲開沔陽否聞之大吏交檄  
勘先以郡丞次兩守縣官愛民各有私大吏令行風霆馳  
誓將盡放蛇龍出江瀆漢瀆平受治徹土不復勞赤子罰  
款先飭良有司酌視三口啟其一桃花春水來喜遲休問  
牛蹠河自注楊贊口在牛蹠河仍尋馬骨垵自注蕭家口在馬骨垵輦致青錢  
二千串一朝金隄成斷岸吁嗟私挖與官開同一決隄功  
罪判

湖上雜詠

部垸如鱗次

自注築垸報部謂之部垸

民居但水環隄殘猶有柳湖好

惜無山稻穗

紅蕖外收花紫葍閒生涯憑澤國誰似釣翁

閑

歲歲防三汛洪濤萬里流地分荆楚望門長宋時州

自注劉宋

張興世居沔門前忽生洲事見州志

板屋南櫟貴臺隍客土浮連年鄰壑水

孤負蓼花秋

到阜原通海湖田秋放淤牽連想口戶

自注隄拔業戶分派丈尺承修有慣

口者白於官爲口戶

浩蕩失田廬賈讓非無策陵陽僅有渠沱潛懷

禹跡旣道且應疏

尉舍同茅埠官城傍石湖泥塗時滑澣剛道總模餬北夢

繁工作東陵集土夫

自注荆襄一帶作隄必雇匠州巴陵人

魚鰕腥不斷旌

採偏菱蒲

離檣雞豚散隄楊鳥雀稀濤聲欺岸瘦江影拍雲肥小市  
漁舫入荒村帶水圍漢川一夜雨鴨綠上荆扉

花提督

連布

征辰州苗陣亡辰人哀之爲發喪制服

立廟以祀花臨陣甚勇苗人憚之呼曰花老虎

坡自征蠻稱得勝

自注苗疆  
有得勝坡

山從入蜀光彭亡飛星夜向

前營落殺賊身經百戰強痛哭一軍皆制服發喪諸部盡

焚香辰龍古驛傳新讖矯矯威名鎮此鄉

自注花亡處  
爲落花坪

陳選貢啟

三十一首

啟騰字敘齋攸人乾隆己酉拔貢有麻田詩集同

縣陳之璘云吾宗杜溪門才之盛多專集著錄敘

齋濡染家學別具解悟陶冶性靈沈酣今古無規  
仿雜揉之弊今閱其集才氣有餘榛櫟未翦爲別  
擇存之之璘字映南一字瑞卿與余同舉甲子鄉  
試負才早卒今欲求其一字入斯集而不可得可  
慨也

南水追懷王念亭先生

緒風鳴草堂謫仙夜入夢

自注去冬夢公以書招

吞聲成久別遺文

口猶誦伊昔萃名流一堂千載共先生古鄭賈弟子今韓

孟

自注時先祖輩從遊五人

時摩蒼顏簡閒抱漢陰甕種花向河陽調

鶴分薄俸歸來贖兩袖穆如清風頌鴻裁抗燕許能事餘  
沈宋賤子孫曾行襁褓風雪送東馬不能飛梁園散賓從

大瀛高峩我往迹華陽洞垂涕西州道門過腹空痛

按念亭名純繪癸卯進士官安肅知縣爲攸輿名宿有湘筠閣集攸人之言詩者多宗之今其集未見僅存近體一首

見本集八十卷

擬古

捫蝨談世故抱膝樂躬耕一朝遇知己感慨成功名門外  
列長戟堂前排雙旌將相五等崇部曲多豪英運甓不辭  
瘁中原方用兵魏文雅好士干木殊不情恐亦無其才并  
非薄簪纓洪爐鼓萬物得氣各向榮上有摩天鵠下有橫  
海鯨

前有一尊酒行

科頭松樹下掩關髮星星井蛙聒前部山鳥鳴窗櫺野叟

扶杖來唧唧聒我聽北方兩鴻儒挾乙手不停城南羽林  
兒目不識一丁叱咤生風雲倭談道德經我時塞兩耳堅  
坐眼常青息心撫綠綺張口誦黃庭前有一尊酒聲不聞  
雷霆

醉歌行寄玉川

北平射虎飛將軍封侯乃是下中人魏其武安睚眦隙間  
以曹事殊生瞋功名富貴豈長有漫博涼州一斗酒盡地  
平看石點頭談天仰視箕張口夢魂彷彿三山椒遊屐不  
過萬里橋錦暉繡褫容坐臥杖頭一擲空黃標屠龍技巧  
竟何用蠟鳳才高賞心衆蚌胎夜藏蚌社湖龍耳畫割華  
陽洞坡公晚歲參禪關玉帶畱鎮山屏顏屢戒季常殺鵝

鴨鰲湯蜜汁相往還荆叟平生不耐坐南山騎驢北窗臥  
三謁未從濂溪遊六經漫比伊呂佐潛夫論就心徘徊不  
遇皇甫何有哉朱門絲竹客常滿赤壁杯盤歸去來得二  
老兵便知足解語禿巾埽塔服苾芻不向空王求撻策誰  
尋詹尹卜花落茵溷將無同如君才調真超宗借問日持  
青鏤管何如傳觀六鈞弓三閒瓦屋玉川子小囊大蓋足  
文史鳶肩火色高陽徒木石吳兒竟誰是

丈人行

丈人使筆如使兵十盪十決無畱行陸截太華水渤澥三  
更忽到飛狐城水族夜哭山魘泣耳邊埽卻雷霆聲巖湖  
珠光天可燭海舶鐵網珊瑚擎十洲三島枕上得黃河一

曲還一直老明冬牝五千言李牧奇兵左右翼文成抵平  
笑不休杖屨所至成丹丘上尋碧落摘星斗下墮紅塵呼  
馬牛扁舟一葉魚鰕侶長風颯颯黃鵠舉捻知天聽日以  
高低首那堪作常語

失題詩四首

夷堅尋舊志接武漢君平太史言先立秋江水獨清蠅頭  
誇事業蝸角關功名秉燭吾何有山村憶舊盟

五際昔能事陳風今未刪疏槐連夕市小草出深山採藥  
君臣合傳杯伯仲閒鼃觚多歲月奮翼且知還

廿載蓬中鹿芻尼曉乍聞新知敦古誼故事檢遺文有道  
同舟日無心出岫雲他時真率會樽酒倍殷勤

旭日影曠曠齊年問射洪寒禽皆嚮北驚馬更徂東去住  
心難定行藏道自同毛生爲親喜昂首企蒼穹

徐州

羣山合沓赴彭門賦就黃樓酒一樽千里扁舟浮暝色長  
洪百步湧沙痕詩人猛士雜龍虎自注用坡公句東閣北窗眞弟  
昆誰共流脂題石滑宋公臺畔弔吟魂

月下偶成

半路修行果笑人玉堂仙豈是前身當頭月出還相識信  
口詩成似有神未了宿緣青鏤管依然獨坐白綸巾百年  
三萬六千日榮悴邯鄲入夢頻

顚仙

終始任黎高誼全通神十萬果翩翩論交四海兄何愧  
賦長門妾自憐未必子臧居讓水不妨顏氏飲食泉諸君  
共際昇平世好署頭銜作懶仙

無題

犀簾紅麝印綺紋玉臺釵珥在繽紛前身秀奪遠山色殘  
鬢香餘沈水薰不見已憐韓吏部遲來應感杜司勳羅浮  
曉夢閒追憶握臂裁量小半分

岳陽秋夜

百感中來旅夢驚步檐還看斗牛橫一年秋信蟲先覺千  
里歸心月共明風動疏簾花避影酒醒孤館雁飛聲鐙殘  
漏盡披衣起倚欄干唱渭城

四月八日寒甚日夕遲劉梅莊王洪範岡吉不至  
焚香鎮日掩雙扉潦倒青氍計已非曲巷草荒生意減遙  
天雁斷素心違暮雲無賴常遮嶺涼月多情自入幃擬向  
江頭聊一醉寒深未便典春衣

嶽麓寺題壁

古寺殘僧參佛祖孤舟獨客弔湘君江翻已落猶迴日山  
帶初垂忽斷雲豈有詩名杜員外徒勞畫本顧將軍道林  
拄杖俱陳迹木葉蕭蕭下界聞

偶題

文德過於茅季偉杲之差似郭林宗高風自昔推南郡不  
數僑居解仲恭

荆公新法方師古鄭俠流民已繪圖若使濂溪門不閉六  
經中自有嘉謨

唐代已無前進士漢廷誰起故將軍太師忽作翁翁喚南  
渡天高了不聞

藥鑑經卷自年年浪說洪崖許拍肩不解淮南何妙訣庭  
中雞犬亦昇天

感遇三首

阿瞞俠氣高千古贖得文姬入漢關繕寫不須煩十吏親  
傳手澤到人間

旗亭少伯擅風流潦倒還鄉竟斷頭不是張公湖海客河  
南軍法失閭丘

雁門食雁本庸奴  
屣屣出迎今有無  
縫披千秋齊捧腹  
不須高論著潛夫

無題

綠暗紅酣歲月淹  
隔樓珠翠草纖纖  
潘郎李下低頭過  
怕有懷人暗捲簾

漫興

漢將凱旋功似狗  
晉家甌缺馬爲龍  
童謠天語一時定  
細雨寒煙蕭寺鐘

畫方兼得畫圓手  
左右俱宜聞所聞  
浪說人間多缺陷  
隨何無武權無文

寄奴不死是真王  
赤帝高飛白帝傷  
餘向江南作操莽  
生

擒天子出咸陽

沖霄鸞鳳御書裁  
火色鳶肩笑口開  
一百萬貲天府賜  
漫言無地起樓臺

片言已脫牛元翼  
下澤長驅馬少游  
叉手功成堪一笑  
依然三接石鄉侯

趙佗南面北單于  
創室文皇陋版圖  
夜半賈生前席問  
人謀兼得鬼謀無

五馬渡江開六朝  
南山坐對晚蕭蕭  
督郵到縣攢眉去  
卻爲門前柳折腰

梅花坳

山北山南盡種茶  
欲將杯酒問梅花  
黃昏未肯分明語  
聞

道仙官晚放衙

周選貢錫瑜 一首

錫瑜字采庭寧鄉人乾隆己酉拔貢

贈門人張大令服闋之閩兼答其舊所寄詩卽以代  
簡并序

大令名學尹字子任余主講湘陰時曾從遊門下別十  
餘年幾不復記憶其人矣去秋郵寄尺書并試卷兼覓  
詩五章適余病瘡劇未暇啟閱今春展視之始知其占  
籍順天成進士以縣令分發福建未往而居艱其拳拳  
不忘老夫之意流溢於楮墨閒可不謂篤於師友之誼  
者哉今秋服闋將之閩矣詩以代書卽贈其行

明月出海底一朝揚光輝荆壁以趙顯楚材爲晉資歷遠  
始見珍遇合何獨奇佳卷旣欣覽且還讀新詩詩中何所  
有拳拳情見詞具道出身由亟言函丈時駿足自開道引  
途還仰推巨川已注海尋源還溯洄閱人吾老矣意料甯  
及斯憶與子離別荒田長自治萱堂迨西日寸步常苦羈  
潛賴樓幽巖春溫誰見施何期侑儻生遠致纒縣私一字  
不忘本古道今已微培根亮深厚榮柯當益滋吾衰久不  
夢斯道將安歸勸子以努力良吏原可爲蒲邑三善著卑  
父五紘揮颺越古荒裔風教今轉移豈曰無盤錯發硯方  
及時大鵬搏扶搖逸翮齊雲垂上酬

明聖君下慰殘

喘師

張武緣其祿四首

其祿沅江人乾隆己酉拔貢官廣西武緣縣知縣  
蓮花塘晚步

江城雨初霽暑氣覺微斂西日半銜山暮煙橫數點攜筇  
倚流憩香風吹冉冉菡萏冒淪漪蒲藻澄澈比隣孳鷺  
鴨生齒繁已漸捕魚應縣符采蓼救年歉性安澤國居不  
習架崖厂湖鄉我久別荆扉終歲掩何當此卜築將家就  
蓼茨泛觴臨清波醉臥展湘簟行行且延佇暝色赴溪隄  
微徑黑無月流螢弄清燄

沅江竹枝詞

家養鷓鴣伴水居菱花荻葉繞階除東津打魚南津賣半

是鰯魚半鰯魚

陂澤田低憂雨澇石湖隄堰歲增高卻逢小暑南風扇楊柳陰中響枯槔

早稻登場又稻孫家家賽社足雞豚官租納卻渾無事半夜稀聞吏打門

彭選貢興護 三首

興護字薄墅湘鄉人乾隆己酉拔貢有集薄墅甚有時名集未見前已錄其二首入資江耆舊集矣今復從方志採得一首補入斯集以廣其傳

詠史

燕然山可勒狼居胥可封逢時樹奇績披簡欽英風卓哉

新息侯具此平生胸款段嗤弱弟矍鑠誇是翁曳足亦已  
憊裹革心無窮銅柱千古垂明珠一夕蒙不載蕙以還謠  
啄何由工

草夕一厓宅賣卜成都城吾慕揚子雲更企嚴君平鉤簾  
百錢足下帷註道經沈冥日以久譽聞日以輕詎料碧漢  
閒有人知最明竟日談忠孝天高正卑聽誰言士不遇而  
遂無功名

洗筆池懷古

萬年宮中夜大水旱兆才人作天子陰令長髮那得知力  
諫正位誰能比叩頭置笏殿階上碧血淋漓照青史難忘  
顧命太宗恩不忍濫刑元舅死老臣賜珥潭州督暇日揮

翰龍城裏臨池浣筆亦偶然  
霍霽元雲標絕技攀王提米  
宛禊帖挂月凝烟驗遺字  
要緣在在寫忠誠飛鳥依人何  
足擬吁嗟桂州又愛州韓琬來濟同邊鄙未聞顯慶四年  
詔天遣考終良有以猶兒除名越嶲歿鸚母折翼上陽徙  
祇今惟拜褚公祠墨香浮動長無已

劉教諭方璠二首

方璠字遜田零陵人乾隆己酉拔貢官激浦教諭  
衡州府教授有聰訓堂集遜田爲余鄉試同年芸  
莊教諭方璠之弟兄兄弟皆有時名遜田所爲詩更  
多然少可存者集中有無鹽行五首頗關係吾鄉  
利弊爲刪節存之

無鹽行

永州竟似無鹽城從無淮鹽入永境自從官引粵改淮永  
民淡食已成性借問何人陳此條章程方伯郎公定永清  
其時御史誰入奏前有郝公溶後有甯爾講新舊額引八  
萬一康熙六年著爲令當時改食求利民誰知後來爲民  
病淮產粵產兩不來三升五升待誰贈楚產最饒鹽獨無  
天公正待人爲政獨有中丞馮鈞與敦福劇憐法獎思改

更

永去兩淮六千里江湖經涉險且賈楚粵接壤不崇朝湘  
灘一呼可立應舍近求遠埋所無舍夷就險人豈聽無利  
之事誰肯爲客販從利不從令改食粵引事良便一轉移

開民共慶何況聘引本舊章國帑不損民不病賤子賦性  
本淡泊特念民瘼思請命書生公事何敢言告哀聊復形  
歌詠

張試縣瑛一首

瑛字紫堂長沙人乾隆己酉拔貢官平江縣教諭  
揀發貴州知縣紫堂亦有時稱與王洪書江齊名  
集未見今從嶽麓詩鈔採得一首聊存其人不必  
過求也

遊嶽麓寺和王書江韻

疑是蓬萊第一宮松濤颯颯起仙風臺邊鶴去泉聲古樓  
外天低眼界空花雨飄殘春寂歷雲根埽斷石玲瓏萬家

螢火分明在堪歎勞勞入夢中

宋選貢大受 一首

大受字必謙號海門靖州人乾隆己酉拔貢

撰女兒閨狀成更哭以詩

脩脩弱羽訴艱辛百折難移至性真誓以孱軀依白髮耐

支多難送青春四千里外荆枯夢自注庚戌五月二十三

姊覺而心動歸知五十餘年玉潔身腸斷鴿原惟姊在邯鄲

仙骨委輕塵

彭教諭宗祭 二首

宗祭號蘭園城步人乾隆己酉拔貢永明縣教諭

有蘭園草城步在邵西極邊爲資水發源之地明

中葉始立縣罕有聞人蘭園爲鼎亭學博璇之子  
兩世皆有文名亦邵西耆舊之冠也

集同人小飲尊經閣分賦

閒齋晝日靜垂簾小集同儕韻懶拈村酒新篘聊復爾  
盤重疊亦何嫌耽將風月愁添債貪邵鹽壘畏損廉爲謝  
諸君休迫促久將退筆笑江淹

過古封有庠處

一肩行李夕陽東往復羊腸鳥道中峭壁何方埋傲骨  
陂終古怨離宮灘聲欲滴思君淚碣篆猶餘愛弟風尺布  
能縫成底事不堪回首叫孤鴻

沈澗齋集卷第一百十六終

沅湘耆舊集卷第一百十七

新化鄧顯鶴湘臯編輯

長沙毛國翰青垣校訂

張兵備經山

三十四首

經田字壺山湘潭人乾隆辛丑進士歷官內閣中書浙江海防同知貴州思州鎮遠府知府分巡貴東兵備道有壺山吟草壺山精內典自號黃須道人所爲詩時闌入禪語要其性靈標致自不可沒

貴溪舟中雜感

泊舟入深村不覺風煙冷西崦有人家地僻雞犬靜耕鑿心太平力田歲月永我無負郭田愛此田閒景

迢迢煙波裏，謳鶉聞櫓聲。  
翛然幽且潔，喜與鷗鷺親。  
一溪影婆娑，避撓飛且鳴。  
物我理一致，誰是知幾人。

平生愛幽僻，臨水復登山。  
僊崖二十四，望之喜欲攀。  
石髓儻一逢，未解駐愁顏。  
風急毛髮慄，翩然一笑還。

光陰似石火，世事如碁局。  
司馬舊豪華，中書漸老秃。  
窮猿急投林，好鳥知擇木。  
聊爲汗漫遊，未擬窮途哭。

歲晚霜雪厲，天寒草木乾。  
窮邊猶帶甲，諸將未解鞍。  
此身甘棄散，豈敢貪晏安。  
白面談何益，世久輕儒冠。

潯陽齋居雜詠十首

甍脫䟽屬，情優游適其天。  
晴窗飛野馬，吹息紛盤旋。  
微酣仗卯酒，偶倦成午眠。  
非懶亦非放，聊從意所便。

居室何所有隨分遣人安一爵復一肉竊比東坡餐還如  
放翁室一儿一蒲團事事都過不賸有心中寬

上有白髮親時年八十五事事常自克天將以年補強步  
不須扶如餐還自努年老人爭羨羨不爲老苦

涉世苦憂患知來覺迷途晚歲學無成且學道之餘日誦  
金剛經達者笑我迂視彼役役者爲之猶賢乎

身閒苦無著好書不釋手此生如蠹魚斷簡我所守讀書  
知其人論在千載後古人不可作羹牆覓師友

我雖不工詩曉詩我亦頗少陵太苦吟千古啣飯顆莫學  
語驚人但力求其妥妙句偶得之詩成一笑可

寡尤在慎言古人重箴守每動輒見尤噫嘻誰之咎子由

別子瞻相規惟指口白今與爾約只可飲醇酒

嵇康論養生害性戒厚味又聞東坡云寬胃以養氣我無  
聲色娛飲食在所畏謹當銘盤盂下箸如探沸

貪嗔與癡愛吾曹坐此疾生滅滅又生醫者無治術吾得  
真人方眠坐皆抱一持此不二門舊疾忽如失

流光如激電一去便難挽所以古達人功業懼成晚簪紱  
廁名流寄志託高遠立身貴濟時當不徒車轍

大雨

我遊回龍寺紀遊曾賦詩酌酒呼龍回

自注遊回龍寺有酌酒呼龍回之句

呼龍龍何之神龍在天上去來甯有期雲行而雨作此卽  
龍來時今年景氣佳好雨及春施旣雨晴亦佳得晴雨更

宜昨宵大雨至白水盈于陂九衢塵一洗四野田盡犁大  
哉煦陽天育物甯獨私天心誠愛民我亦與民齊千卷空  
挂腹不再食則饑年豐萬事足外此何憂爲起占仰雲漢  
此念不少差

苗女

苗女不避人三五出城郭襖兒事田疇纏頭雙赤腳生女  
可當男孰云風土惡與其倚市門不如勤力作

歲暮感懷

自往時  
客桂林

兩地西風淚全家東海君支離思難後骨月死生餘郵滯  
音書斷途窮生計疏憑誰供俯仰歲晚更何如

羈旅逾三宿殘年無一堪壯懷憑酒揮詩思向梅探老樹

風聲撼濃陰雪意酣家山空悵望無夢到湘潭

岸幘名心澹閒吟逸興長不須書咄咄且復任堂堂金盡  
見交道情親重故鄉歲時勢饋問客路意差強

移居新街旅店

來就新街店門庭我到曾

自往來省會  
三寓此店

移居忙似燕危坐

淡如僧賓館一無事吾儕百不能將何消晝永吟與醉相  
仍

遣懷示汪研薌

作客苦幽獨巡檐自往還沈吟詩一卷睥睨屋三閒呼雨  
鳩聲急粘花蝶意閒宦遊驚物候隨分喜看山

小住結西鄰殷勤過我頻鶯花三月莫風雨一鐙親句向

杯前索交逢老輩真欲歸歸未得同是簞書身

幻意

萬物各呈態憑誰參異同巖花自開落流水任西東以故  
心無住從知色是空試尋雲起處身已在雲中

之官黔西過岳州感懷

巴陵勝狀未銷沈不待登樓繫客心卻愧官身過故土空  
聞鳥語遞鄉音江連蘭芷吟懷遠家本蕭湘別感深多少  
親朋都隔面相思惟有淚盈襟

拈東坡風流可惜在蠻村句作長律

地瘠官貧何足論宦遊到處盡君恩几窗拂拭琴三疊  
畫諾從容酒一尊山色儘堪娛老眼風流可惜在蠻村秋

來別有關情處寄與閒閒收畝園

黃平道中

粉堠經過第幾程客途差喜雨還晴山多口向危峯吐地  
少人依側坂耕古洞寒雲烘石色迴谿幽響瀉琴聲自注  
有飛雲巖盤輿卽目多奇絕莫恨投荒萬里情

書齋遣興

檢點牙籤幾几清青氍依舊一書生靜從月指參禪寂喜  
借雲煙見性情雨歇深林紛鵲噪風寒古寺遞鐘聲就中  
妙得聞思諦莫向人間憾不平

沅州鞠案寓觀音庵

冠蓋追陪興不孤况逢景物近枌榆天寒漁水初飛雁樹

攬秋風乍憶鱸禪定偶來依紺髻霜容先遣上黃須自注  
號黃須道人簡書未礙如如意贏得閒吟一事無

新年自詠

我生何事可堪誇結習空餘閱歲華詩到性情那有派字  
饒風趣便成家深簾氣靜書歸軸古院聲銷吏放衙領得  
箇中閒意况耳邊鐙鼓自喧譁

寺門

寺門花鳥總怡人天與蠻方一例春索句卻宜僧世界看  
山都是雨精神空塵竟似逃禪客說法依然作宰身消受  
齋堂閒半日一編貝葉與君親

省院曉趨

沙洲耆舊集 卷第一 下 王  
睡起銅鉦挂樹時趨踰隨分肅官儀  
籃輿塵淨雙鞭導鈴閣風清兩部吹  
羣岫煙雲環太府一天花雨散諸夷  
歸拋手版渾無事贏得閒情漫賦詩

道意示扶風寺僧慧先

老去黃須霜雪侵世緣淺處道根深  
華嚴法界皆詩律歡喜因緣卽佛心  
多忙無聲牢把握黃庭何處細追尋  
箇中靜意憑誰覺消得公餘自在吟

蘿山廿一弟還銅回瀕權蒙自以詩寄次韻

黃葉西風憶去程忽傳芳訊遞邊城  
一官琴鶴猶妻子兩地參商感弟兄  
久客途窮知友重勞生貧慣覺愁輕  
幾番盤錯衡心後努力春暉卜此行

費西塘黔中草題辭

驛路迢迢足嘯歌探風問俗入牂牁圖經寫就成詩史不  
爲青山得句多

張獲鹿廷儀

三首

廷儀字鈞湘湘潭人乾隆辛丑進士授獲鹿知縣  
有鈞湘草鈞湘著作甚勤尤邃於易嘗著禹貢山  
水考周易解詩學緒餘諸書小虹山房詩集

昭山

石磴盤逶迤羣峯逞天矯巍峩一柱尊巋然出雲表山巔  
古寺矗疏鐘隔蘿蔦緩步凌崩劣縱目展清眺宿霧已全  
消歷歷衆山曉此閒鍾神秀餘光起朱鳥湘水逕其西旋

泉深且窅

自注水經注泚水北逕昭山山下

鬱爲南津

城波光互縈繞低徊橘洲仙煙草青未了蛟宮瞰幽閣龍

窟俯窳窳遠樹若薺浮輕舟如芥小懷古忽無端憑弔心

惻惻馬山誰易名鄢陵人已渺

自注武穆王馬殷王銅柱楚改昭山爲馬山

委蔡棘春園闕窈窕蒼涼信叔居虛無寄林杪英雄去一

邱風葉空擾擾茲山擅名勝蠟屐遊人少吾家久居此園

林閒池沼古石舊磷磷清波日皎皎乘興叩山蘿松逕帶

雲遶

### 興馬洲懷古

湘流如帶浪鱗鱗日斷芳洲杜若春草色六朝迷北渚水

聲五代咽南津河山久據分封地煙月空存弔古人欲問

向時歌舞處蕭蕭荻蘆城闕

自注潭州舊有南津城

往事何勞話戰爭波濤猶作鼓鼙聲  
洲環湘水人煙淡月暗鄢陵墓木平  
帆影夕從汀際落江花寒向澗邊生  
當年帶劍雄南楚可奈金甌再世傾

陳編修士雅一首

士雅字汝清號每田長沙人乾隆丁未進士改庶吉士授編修以母老乞歸不復出歷主朗江石鼓城南書院講席有春草堂集未見

神禹碑

神物豈終晦奇蹟溯大禹岫嶠開鴻濛元氣一碑柱埋翳數千載昔賢竟莫覩至寶欲出世天慳破樵豎嶽神不敢

匿光晶耀南土蟠鬱蛟龍纏離徙鳳鸞舞想見蒼水精秘  
授金玉譜山川繪情性乾坤奠門戶奴隸漢學碑睥睨周  
宣鼓書生楊與沈翻譯空自苦靄靄衡山雲漠漠橘洲雨  
微禹吾其魚浩歌企江浦

周蘇州鐫二十五首

鐫字蓮若號春田長沙人乾隆丁未進士改戶部  
主事歷員外郎中提督貴州學政出爲揚州府知  
府調蘇州府以事謫戍伊犁旋赦歸卒於河西旅  
舍有聽雲山館詩鈔春田爲諸生時與澈浦嚴樂  
園廉訪如燈讀書嶽麓講求時務爲經世學守蘇  
州甚有政聲以獄情出入獲重謗致嚴譴或云當

道與有隙故文致之不能明也春日能書畫善寫  
風竹尤自負其書法嘗接古名人手蹟自范文正  
文信國方正學于忠肅以下數十家各繫以跋銷  
諸貞珉名曰人帖今藏吳閬某市元和馮培云聽境由獨造縱筆所之驅雲湧濤不可方物吳縣潘奕鶴云聽雲詩無規衍之助有神妙之契直舉胸懷絕無依傍洵善言其性情者也如燈云聽雲詩有奇氣抒寫性情卓然成一家

### 夜思

霜柝鳴高城青燈暗空壁夜靜衆星繁天寒萬籟寂止水  
心自清妙看羣動息

### 君子行

川潰不可塞馬逸不能止巨石穿屋溜君子慎其始棄井

何足貴源泉乃稱水雲過天蒼蒼溪涸石齒齒再思可以  
行三省良有以

田家春曉

田家無四鄰開門惟有樹不復辨山翠蒼茫見春霧攜鋤  
出原坂牛跡紛滿路布穀時一聲飛過西溪去

宿上封寺

天上亦有寺夷然畫壇界入門鐘梵清林樾散幽籟下視  
數百里洞然歸盼睽僧居久忘高了不以爲怪偶作一偈  
留茲遊願稱快身臥白雲中夢在紅塵外

鄴侯書院古蹟詠懷

讀書作宰相事甚無足怪懶殘者何人饒舌及方外煨芋

刀未熟白波多言戒山僧非許劭月旦何狡獪  
皤然紫蓋峯流風緬唐代嗟爾浮屠人矜言戒定慧

京邸寓齋有竹數竿生筍四皆成竹喜賦

小窗低壓綠筠綠相對此君聊免俗錦綳穉子忽挺茁伯  
仲叔季遞相續五六日來長如人勢欲搖風戛寒玉主人  
畫竹苦未工日臨舊譜嫌雷同新翠拂簷日條暢會心儼  
與筆墨通吟秋聽雨無不可逸韻森森自清娜屋僅數椽  
地一弓情味竟如邱壑安我非肉食自長瘦小院清風佳  
致頗

孫節愍公墨蹟

劍有氣筆有鋒大節不朽傳孤忠墨光黑淚點紅遺臣愁

泣孤蓬中長江宋陷大事去馬阮方如燕巢幕閩中脫走  
心力枯意氣乃同史閣部燕子磯頭日方暮舳艫擬欲問  
前路嗚呼二百四十餘人諡節愍何乃不約而皆同祇今  
遺墨寶世裔凜然生氣光熊熊我生何幸得睹此想見濡  
豪走筆揮長虹

書永綏同知彭雲軒先生死事詩

并序

公名鳳堯廣東廉州人乾隆丙子舉人官湖南知縣所  
至有廉能聲遷永順府古丈坪同知調辰州永綏廳同  
知所轄皆苗地也公御苗最有恩苗敬愛之呼彭青天  
永綏與黔松桃廳接壤乙卯正月黔苗亂楚數驚公與  
副將明安圖籌所以綏靖之略公曰苗愛我我出喻無

不服者楚苗服黔苗自戢耳明迂之以兵三百出公不  
得已亦出苗見兵知其將殲已也噪而前縱火迎敵兵  
遂潰副將與兵三百皆死之公亦被害少子某力戰捍  
父同死苗知公死則大哭繞城呼曰彭青天好官殺之  
乃黔苗非楚苗也相與舁其尸瘞之事平其子佩蓍猶  
得認遺骸以歸葬者諸苗力也公爲鍰鄉試房師其死  
事本末余友澈浦嚴樂園如煜旣爲之傳鍰作啟上之  
制軍姜公爲之題請得卹典廕其子佩蓍佩蓍死復  
改廕其孫名球時方八歲也感念師門情不能已因敘  
其歸骸顙末補嚴傳所未及而系以詩

苗具人形有人理好官亦解憐其死永綏圍城聚衆呼急

白黔苗非楚耳先生作官數十年到處名以彭青天自我  
枌榆及苗徼口碑同說無不然乙卯正月黔苗亂楚氛未  
熾易解散明公武夫徒用武先生同出遭厥難其時僅挾  
三百兵貿然而出無一生公時從容死就義激浦一傳最  
分明少子從戎性純孝仇切戴天刃可蹈無何兵潰亦死  
之地下國殤應共笑讀聖賢書何爲乎父忠子孝理不殊  
猶記師有自壽語果然大事非餽塗自注公六十自壽詩有差強大事不餽塗  
之句竟我昔遠得公子札歷言苗情會不愬檢存遺骸致  
成詩讖公子歸正首邱葬東粵乃知遺愛苗亦同官好德厚論至  
公不然倉皇致命者誰裹馬革兵燹中曾爲上書訴清節  
當事諸公憐義烈嘉忠子孝有同心直以死綏陳 殿闕

聞磨子自殊 思雖死不死褒忠魂豈知貌孤亦摧折  
焚焚猶有名公孫我爲先生門下士聞之涕泗不能止亦  
知守土死宜然瞻望門牆情曷已明德之後有達人此理  
不爽同屈伸遙念鸞雛隔嶺表何時健翮驚高雲

按先叔父鉅野君辛卯舉鄉試時實出彭公房其  
死事之年從兄鴻往謁公於永綏將至苗驛已兆  
兄性與慎疑有變遂不入而返已而變作關署職  
焉兄得免兄今尙存年八十矣嘗屬余作公死事  
傳以未得其詳不果今檢閱  
聽雲詩序略爲刪節存之

題周端孝先生鳴父忠介公血疏帖黃遺蹟

媚璫者生逆璫死有明國是可知矣我聞當日慘死六君  
子皆由媚璫之人希風旨魏閹雖伏誅倪毛尙未正刑書  
父仇旣未報兒冤何處訴孝哉端孝公遂以血爲疏血性

本至性血誠本至誠嚙斷十指血雖竭破吾舌尙可以陳  
情淋漓帖黃一百四十有四字十三行布光分明此蹟流  
傳顯晦殆有數二百餘年什襲更幾處我友好古富珍藏  
忠節名賢手蹟一一題品考據詳我生已晚何幸得睹此  
血光凝碧寒寸紙爲之補刻入人帖自注時方集白宋文  
信國下及明代諸名  
賢忠節手蹟勒石命名人帖謂以人爲帖也中有周忠介  
公手書數紙復得此蹟祇爲補入帖中以徵父子忠孝  
之節云父忠子孝光簡牒堂堂精氣永不磨豈但恆沙千鶴  
劫

登樓偶懷王節補

樓高山衆木心遠似孤雲落日一憑眺長天有雁羣風煙  
秋漠漠霜葉曉紛紛更望昆明路無由一見君

舟行雨泊

一櫂沿湘岸孤帆意黯然  
市鐙紅在水江雨黑沈天  
雲厚方堆絮風寒欲折絲  
遙遙泊前渚橫枕臥炊煙

十月初七夜月

白月將弦夜影斜光未舒  
霜痕窺樹杪寒色上堦除  
葉落蟲聲靜天高雁影疏  
含情更延佇愛此小窗虛

十四夜月下懷陳蘭莊

更靜月逾白小園霜氣深  
偶然貪夜坐不覺轉亭陰  
寒樹驚簷雀風鐙搖壁琴  
懷君橘林下此際正孤吟

春夜柳下坐月同嚴樂園  
如燈秦竹酒敬衡羅麓西  
琦因憶東坡先生持藻交  
橫之語遂賦一律

萬古此時月清光無不同偶來垂柳下並坐綠陰中持藻  
生衣袂雲煙淨太空予懷念前哲還復憶坡翁

六月初四日出都聞蟬

忽忽出碧城茂樹忽蟬鳴豈是慕高潔亦非懷不平似知  
去者意故作送行聲風息林逾靜悠然愜所生

舟泊鎮江望金焦兩山

江色澹無際金焦兩點青卻憐名勝蹟祇作宦遊經出類  
風旋絮心驚水泊萍再來須蠟屐暫與寄山靈

焦山同友夜坐

海氣入鐘梵江風閃夜鐙倦飛如病鶴兀坐類枯僧公暇  
知難遇消閑得未曾名山來我輩把酒興同增

同秦竹潛羅麓西飲於江上酒家

春愁忽有破顏時  
邨店歡然把酒卮  
山色過江青鑿落水  
光當戶綠玻璃物華他日原無異  
吾輩能來此最奇  
一路鶯花供醉眼  
任他曉笑總相宜

飲巖樂園初度酒醉賦

人生對酒正當歌  
廿六年華君始過  
豈是丈夫無血性  
要知世事有風波  
怒堪植髮談殊壯  
器貴能堅玉可磨  
他日鬢肩說吾輩  
青雲於子望中多

岳陽樓望洞庭

八百湖光一鑑平  
危樓豁達上層城  
此來足放高空眼  
人事何多偏側行  
酒可名仙飛去易  
塵都如夢到來清  
卽看

迴瀾一杯酒陶然自酌近鄉情

下至雲峯寺和家靜山明府致遠韻卽贈萬融長老  
喜作南衡一度遊雲峯古寺倍清幽鐘聲入暮方聞梵  
色彌空正舉頭惠遠禪心剛破寂嬾殘風味正宜秋塵  
情一片歸衣寶好爲偷閒半日留

登岳陽樓

又見平湖八月秋西南空望水天浮神仙說醉甯關酒過  
客何緣屢上樓怪爾君山青在眼感余衰髮白盈頭憑欄  
暫作凌虛想腳底湘波萬古流

題畫

遠岫漾漾碧樹環春江無際綠波閒何當得便乘漁舸去

看瀟湘雨後山

滁州道中

舊見環滁一帶山清流千仞下雄關難尋故事無遺老意  
狂廬陵筆墨閒

遠勢蕭疏樹影環平疇潤綠水聲潺湲與默望心惆悵疑  
狂吾鄉用體閒

羅庚常廷彥 十一首

廷彥字湘舟衡山人乾隆庚戌進士改庶吉士未  
授職歸主講城南書院有湘洲詩草湘洲爲升之  
先生登選之子性恬退以庶常終詩才清雋無愧  
名父之子

白雲洞

自注在城步縣

出郭未十里羣山聳如蓋行行至洞口已覺雲霞鬱榛莽  
雷虎跡雞犬絕鳴吠須臾造深處白雲忽晦昧出入氣氤  
氲飛騰光破碎盪胸擬望衡刪石想登岱紛紛森萬狀莫  
可名奇怪下山更儻恍回顧猶飄飄夕陽在歸鞭方知在  
雲外

謝青弇刺史招飲萬樓

昭潭古名區山水足游衍危樓聳百尺戶牖開面面拾級  
望層霄磴道通一綫連山青繞郭遠水綠環縣嶽色從西  
來蒼翠雲間見飛空禽語喧卓午鳥聲變良苗蔚平野炊  
煙散芳甸賢宰耽逸趣乘暇展公譙清尊羅衆賓行廚列

芳膳須臾管絃奏清歌復宛轉歡笑雜諧謔獻酬藉清宴  
茲游快心目懷古吏留戀緬維杜陵叟南征感檣燕空靈  
與鑿石題詠在行卷經此獨無詩遊跡豈未徧長歌待後  
來風景逐流電

相見坡

黔中少康莊高坡開面面下坡復上坡瞻望目苦眩路轉  
峯卻回坡遙忽相見羊腸自天降微茫通一綫荆榛虎豹  
豪攀陟猿猴便五丁何年鑿開此列郡縣時當孟冬日霜  
楓餘峭蒨興夫喘未息流汗如水濺顧此三嘆息何忍加  
呵譴前途更巉巖遠遊意已倦

韓鑑少室餐松圖

余嘗愛名山志在游五嶽中州屢信宿未至嵩山麓曾聞  
少室松礪礪布巖谷虬枝孕古節黛色掩修竹伊誰啖其  
脂飛行謝塵俗韓君餐霞人冲澹寡所欲顧茲冰雪姿餌  
之可辟穀有時風雨來洞壑淨如沐但期駐我顏不願夢  
生腹僊佺與道明千秋企高躋豈同肉食輩瑣瑣自拘束  
願我牽物累未得友麋鹿引領望丹邱疲茶乏仙骨安得  
從君遊松閒恣遐矚

懷湘曲

湘中之水何悠悠湘娥一去水空流九疑雲深望不見至  
今騷客懷離憂前有靈均後賈傅同作逐臣君不悟招魂  
我欲問山靈楚澤茫茫在何處鷓鴣嘯罷江峯青漠漠悲

風來洞庭湘水千古流不絕竹上之淚那可滅

游五臺寺贈德參禪師

山徑通禪室閤鐘不覺喧崑山應好在卓錫至今存衆木  
陰連屋雙江綠到門道人清淨理洗鉢願忘言

白注崑山此寺開山

之勝入定後雲遊不知所之

長夏

長夏山居好逍遙禮數寬雨多花事歇樹密鳥聲寒稼圃  
訥田父泥塗避達官興來池上坐隨意把漁竿

宿沙河縣

解鞍投古意散步凭闌干沙擁孤城閉風吹暮角殘疏鐘  
來曉後孤雁響雲端今夜沙河月淒涼祇獨看

九日登文昌閣有懷諸弟

登臨一望思無涯  
高會何心擬孟嘉  
白雁帶雲穿嶺樹  
西風落葉起邊笳  
地連百粵難同俗  
客到重陽倍憶家  
爲想故山羣季在  
茱萸應插帽簷斜

戊申五十初度

回首頻年爛漫遊  
琴書隨地足勾留  
天涯何處逢唐舉  
幕府誰人識馬周  
飄泊行蹤羞握麈  
艱難生計苦持籌  
輕肥同學如相訊  
射策蘭成已白頭

題畫

驟雨過山隈  
濛濛不知處  
何人策蹇來  
更向雲邊去

桐陰冬日述懷五十韻

荒徼黔南地孤城蜀道邊艱難長作客漂泊又經年高下  
民居接參差板屋連龍從山作障礪礪石爲田地僻無鴻  
雁村貧絕管絃四時惟瘴雨比戶但蠻煙水碓沿溪響官  
鹽裹簪肩錦雞長似鳳野獸大如獬惆悵風光別思量歲  
月遷年華逾四十鄉路越三千旅况親僮僕歧途問陌阡  
生涯何落落往事正拳拳憶狂成童後曾充弟子員藝林  
供檢校黨塾任踟躕學謝樊遲稼途爭祖逖鞭成均方揖  
讓鎖院又拘鐐鍛翮愁難釋騰霄志尙堅鹿鳴聆壯歲霞  
翥慕羣仙曉步蘆滿月時看太液蓮南宮消息斷下第姓  
名傳說項存知已瞻韓近大賢

自注會試呈薦本房程魚門張少青兩先生許以國

長安居不易邱壑意仍牽風雪頻馳馬波瀾屢放船入

門鄉里笑解橐。室家憐捧檄。輪毛義持籌。愧計然蕭條雙鬢改。逼側百憂填。已嘆謀生拙。難言閉戶便。依人惟筆墨。旅室總追遭。書劍飄蓬似。春秋過眼遄。學疏慚問字。坐久類逃禪。何處尋遊釣。終朝握槩鉛。菁華愁裏竭。筋力客中孱。萍泛知前定。薪勞本夙緣。崎嶇還到此。局促向誰宣。霜雪殘冬剝。雲山異地懸。高堂俱白髮。同氣亦華顛。菽水承顏好。椒花獻歲鮮。萊衣思共舞。姜被漏同眠。祇爲懽娛少。深知福澤偏。持家憐病婦。每歲典花鈿。兒輩空佔畢。朋儕孰薦延。十旬鄉信杳。五夜夢魂纏。想像羅含宅。飄零子敬廛。偷閒聊縱飲。撥悶強裁箋。憔悴頻看鏡。升沈欲問天。消磨才欲盡。盤錯器宜先。豈分泥塗老。難將志氣捐。會當排

六闢高翥遂騰鸞

黃舍人齊煥一首

齊煥字采臣湘鄉人乾隆庚戌進士官懷安令丙

閣中書

懷湘曲

湘君南來幾千里一點煙鬟鏡光裏雲和泣罷天蒼茫  
嫋嫋秋風波正起湘山矗矗水潺潺湘花冉冉湘筠斑  
斑白雲望斷蒼梧遠日落空山杳佩環江流屈曲迷煙  
樹畫鵲南橋舊遊處苦竹叢頭叫鷓鴣香草無情春又  
去

周侍郎系英十首

系英字孟才號石芳湘潭人乾隆庚戌會試中式

癸丑補殿試成二川進士改庶吉士授編修嘉  
慶己未充實錄館纂修累遷翰林院侍讀學士  
入直南書房特旨任尚書房行走歷太常光  
祿大理寺卿內閣學士兼禮部侍郎擢兵部右  
侍郎復入直尚書房丁內艱服闕補吏部右侍  
郎以事降編修旋革職勒令回籍道光改元以四  
品京堂起用特派實錄館總纂復授工部右侍  
郎督學江西調江蘇學政至是凡四任學政在任  
調戶部左侍郎卒於任公操履畏慎沈毅寡言其  
獲譴也以湘潭土民與江右客民構隙而開牽連  
被議人皆爲不平公處之怡然及起用被召或

難之曰 士必首及淵潭案將何以對公曰案已  
定矣尙守前說是不自量也然遂以所辦者爲實  
則欺吾心吾敢欺吾心以欺 君哉引過而已矣  
公子貽樸會許寄公詩稿未至今從其兄子增羅  
研生所得一冊爲錄存之其降編修後自題畫像  
云人尙樸實學問亦可人也何尤天寶知我清華  
之秩豈曰左遷翰墨之林不爲冗瑣置汝於仙境  
之寬閒勵汝以名教之擔荷髮雖白而心丹骨不  
媚而行果庶幾哉益篤汝之肫誠不負君不負民  
以不負所學而勿怵於世路之險巇與仕途之輻  
輳其語如此亦可得其本末矣

題深柳讀書堂卷子 有序

孟直弟藏此卷不知何人作觀其筆墨秀雅樹石人物  
無刻畫痕殆非俗手所爲也孟直乞詩人未暇作時將  
遠行爲賦寄意云

山如髻鬟川如掌松聲瀑聲互還往深柳何人閒讀書時  
復支頤對秋爽參差樓閣靜不譁湛然水木直清華人閒  
此境豈易得誰其畫者將無誇老夫生長山水曲朝暮循  
陔忘塵俗屋裏峯巒往往青門前溪澗粼粼綠廿年旅食  
京華春千里鄉關入夢頻歸來方痛人事改自注余時方奉諱歸里  
惟有家山如故人故人相對開青眼眞僞依稀猶可辨春  
蘿秋桂俱有情俗狀塵容一朝浣我年未艾嗟誰顧家居

似客歸無田披闕空自結遐想買鄰那有千萬錢飢驅又  
復出門去一壑何由慰衰暮他年華擬乞閒身還欲移家  
此中住

感懷

回首家何在孤舟客可憐夢魂驚子夜鬢髮感丁年錐卓  
應無地萍浮只信天所嗟親已老生計尙茫然

湘南懷古四首

陶公山

清談遺憾過江前致力中原等障川蓋代名豪八州齊  
雷夢斷九重天論功合受元規拜赴難應慚溫嶠賢老  
婆娑垂釣處千秋舊跡渺湘煙

褚公祠

女戎革命肇金輪先見空勞置笏陳禍甚牝雞將折翼憐  
同飛鳥肯依人佳兒自愛多收麥此獺何曾畏殺身惆悵  
海棠枝上月只嗟無路批龍鱗

鑿石工部草堂

西遊一紀下岷峩水國殘年復此過爲愛古人攀屈宋耶  
將詩聖學陰何愁看極北干戈滿清絕湖南感慨多白酒  
荒江悵飄泊老湘潭計竟蹉跎

胡文定公墓

空言作傳幾沈吟悟主其如惑溺深忝恥甘爲無父國偏  
安難敗復讐心泉流旋繞書堂碧山色遙連宰木陰家學

一門都飽食崇祠千古仰遺音

丙子十二月二十八日大雪登黃鶴樓簡筠圃中丞

及鼎圃學使

老夫乘興劇情狂獨上危樓凍欲僵放眠重教開境界此  
身真覺立蒼茫落梅風細飛仍急爆竹聲多溼不妨且喜  
連雲饒宿麥江流漫把客愁量

歌關驚起道童眠

自注是日遊人絕跡叩門良久始得入

狂客真成謝俗緣

何處淺斟歌對酒幾家高臥笑無煙當年鶴駕憑誰問此  
日鴻泥只自憐莫漫倚欄頻嘯詠恐人傳說是神仙

龍公手熟倍精神

自注今年第三雪矣

一色迷漫望不真界畫屋山

開粉本堆成巖壑失鱗皴兩京賦就應霏雪

自注謂筠圃中丞

詠才高正賞春自注謂鼎甫學使可惜良辰都不管憑教白戰屬  
羈人

嘉魚懷古

浩浩長江雉堞開昔賢曾此著雄才漫言文筆堪千古須  
識原從節義來

朱安西聲亨七首

聲亨字子衍號甌山湘潭人乾隆癸丑進士授廣  
東英德知縣行乞病歸病愈除雲南靖邊知縣最  
後權甘肅安西直隸州知州卒於官甌山有吏才  
所至以廉能稱好吟詠今從其家鈔本選錄數首  
題徐春臺攜女觀瀛布圖

吾聞徐福島東海隔茫茫時有玉女來琪樹共徜徉纖塵  
不能到俯視藐義皇誰折剡溪藤寫之清且芳坐對一洗  
耳如樂忽琅琅洞口桃花水膝下杜蘭香松濤咽飛瀑丹  
鳥揖幽篁有時天風至柳絮爲飛揚嗟我淪宦海四顧殊  
旁皇披圖起嚮往渺矣白雲鄉拔宅愜幽襟懸崖寶玉漿  
乃知上界人兒女情逾長何年緱氏山挹袂話滄浪

棧中二首

孤城常寂處吏舍雜山家村冷宵傳柝人稀早放衙打窗  
紅樹葉繞屋黑蕎花暮雨秋風急荒林噪亂雅  
亂定居人異村塵少土音幸看鴻集澤曾憶燕巢林楚語  
相徵逐巴歌共詠吟無聊于役子極目百愁侵

到關中

四塞風煙雨乍收，雄關百二擁秦州。  
奔流蒼莽黃河暮，冷面蕭森太華秋。  
此去應歌天馬下，從來未識爛羊頭。  
行人漫問當年事，東望咸陽萬古秋。

寧條憶家

匹馬南來路杳漫，故園回首暮雲寬。  
極天關塞孤城險，捲地風沙五月寒。  
詩就止嫌新句少，書來喜報老親安。  
登高把酒誰同醉，指點寧條不厭看。

山城

舊號猶傳吐谷渾，老種聽事歸然存。  
遷喬可喜移邊俗，用武曾經列戍屯。  
水近黃河新漲險，砦過白草晚雲昏。  
時平

自愧無奇略日對庭花把酒尊

涇陽

鳬鷺蹤跡縱說說涇汭無端寄此身  
荒政詎甦千室困濁流難洗半生塵  
歸清燕欽張仲谷處高懷訪子真  
邂逅卽今多勝概可堪鴻爪感前因

李檢討如湘

五首

如湘字粹然一字岳蟠常寧人貢生補華容訓導  
未就乾隆癸丑恩賜進士授檢討有岳蟠詩文集  
岳蟠早負文譽於衡湘閒錢塘陳兆崙尾齋曾  
爲序其文集仁和張忍齋學使姚成督學吾楚延  
之入幕襄校試卷年篤老始以特奏恩登第蓋亦

唐人五老榜之亞也

詠古

白首爲郎官出身非不蚤天子歷三朝眷言傷懷抱好文  
臣不華好美臣不好壯也猶不如而臣今已老  
四十牧海上六十始被徵何乃一出使猶以爲不能  
重推選一策遂上升布被脫粟飯任君自愛憎

採蓮曲

江南今歲蓮花好採蓮女兒對花惱妾貌雖保長如花郎  
心那得不如草君不見羊家多造採蓮船嬌姬整妝醉晴  
煙棹歌齊發溪水曲聲聲唱道望夫憐

沅江舟中

兩岸沙隄築復塌怪波湧入天心湖屈平廟近並多少神  
女臺空雲有無逐隊魚忘寒渚躍叫羣雁向水邊呼霜天  
衾薄勞鄉夢村酒頻澆慰遠途

失題

仙骨人閒韓北渚古心今日孟東郊春風未便重攜手含  
淚盈盈看鳥巢

向學正曾賢二十九首

曾賢字魯齋平江人乾隆乙卯進士授國子監學  
正有愛古堂詩稿魯齋潛心理學與趙文恪公交  
好以學行相砥礪蓋亦慕平江九君子之風而起  
者近見昌江人士呈請入祀鄉賢爲當道所抑可

嘆也詩有深靜氣不媿爲有道之言魯齋有兄曰  
壽山亦能詩有雅樵遺稿句云冷眼界太古熱腸  
迴陽春又云樂事因詩苦閒情爲畫忙惜不見其  
集

擬太白晉風日以頹一首

浮雲何陰陰迷濛障遠目闌香散不收獨自媚幽谷百卉  
交蒙戎吐花依惡木彼交方易成此物誰爲族嘆息窮途  
子搔首但歌哭

擬王建西山

行行復行行西山出雲際迤邐盤青空悠然工遠勢日下  
四山陰返照一峯麗樵人帶歸鳥出谷遙相繼牛背短笛

喧雅被餘霞，露衣待明月。柴門各已閉，風催木葉飛。  
鴈逐哀鴻，鴈厲江天徹。疏星野外互，明蔽康樂久。  
不作踏履空搖曳。賦詩達夜深，不惜露沾袂。

擬同薛司直諸公秋霽曲江俯見南山作

山靜似初沐，江澱如不流。況得同心侶，把袂比浮邱。  
座閒豁遠目，波底拾新秋。鱗鱗弄好影，未覺路阻修。  
蕩漾衆碧入窈窕，青空幽虛中。受曠景微茫，雜然投我心。  
共出沒宛隨不繫舟。揮扇狎游魚，舉杯戲閒鷗。  
物外若有得，澹止將何求。江山幸相識，偶成此遨遊。

碧潭秋月

秋天化萬滓，湧出一團清。碧色不可唾，古銅磨晶瑩。  
倒影

清江雜錄卷之十一  
何淵淵激魄方盈盈冷然欲勝掬惟恐微波生

辰沅道中見諸山

江光通一綫當午不見日溼雲宿復行參差吐巖壁怪石  
露齒齟側視不敢歷徑狹鳥衝舟襟裾墮翠碧聞說隴棧  
奇領此以意適人生經危厲足以守魂魄

和謝元暉遊東田一首

逝者不可追來者胡弗樂風漪石澗流雲度松陰閣山靄  
晝濛濛村春漠漠黃鶯滿樹飛白鷺遙田落起行還舉  
杯徙倚望城郭

和九日閒居韻

世寬人事促理枉餘此生所以古大聖亦惜身後名千古

此重九庸愚同晦明閱世千百世今馳元亮聲清風灑衣  
袖慷慨念垂齡淳源寶所受恐隨時數傾徘徊西窗下老  
榦含初榮何以能可久鑑彼貞一情諧世固寡術捫心媿  
無成

偶然作

悵望在古今兀坐心爲焦掩書旋起立一鳥鳴亭臯流水  
更聒聒清風依我苗我苗已漸長不敢速其饒天地噓元  
氣人功減劬勞朝液自炯炯夜虛同寥寥相顧無相迫生  
理其非遙

彝器歌

辛壬丁甲世難考人閒空繪宣和圖上尊中尊從尊烈燬

雲詭譎空嗟吁廣川款識亦瑣碎弇厚徑闊窮鏘銖紛紛  
耳食幾千載今存其象器則無矧後秦漢朔雍鎬中開劫  
盡疑與俱豈知至寶有呵護天教照耀垂鴻都玉府不私  
擴聖量頒之檜殿供縈紆云此成周盛時物元公斲指  
留宏謨兩聖精英本一氣彝羨錫器良不孤吻爽盟沐往  
釋奠肅視翳刳浮金鋪康侯范制屹典重堂堂鉉耳捐雕  
鏤輔以召仲佐從享更示孳乳相將扶受言欲與巨鬯浹  
受盟恥以瀝血誣東榮設洗有遺意懿鑠告潔基走趨况  
復將將正法度牧菴翳昂星樞上文雷雷下雲紛十光  
雲然盪與瓠此皆曠代所珍秘不隨凡物同模範或斂方  
矩鎮坤軸或儼圓規承乾符或偕圭瓚爭密栗或共巖巖

還始初體質淋淋萬象豁神采繹釋三古映當年鍾簋振  
羣洛高拱明堂開天衢牟敦翕施射天地薦之郊壇逮崇  
雲螭虹屈蟠待雷雨澤潤兩都噓朽枯祇今煌煌絲竹側  
寶氣何止千璫璵睇視五指不敢捫流脂妙細分霑濡爪  
皮油油漬蛾綠摩挲太息寒眉須夫子宮牆極美富卻埽  
甌甌與康瓠桓公歌器致詳核柱下球圖還彷彿以茲法  
象臨對越想見當時制作殊市邱齟齬未足數微綠旅甌  
製亦巖何如俎豆親孔壁陶殷甄周五典敷妙哉繪畫好  
身手分刊凹凸無差齟星昭漢回不剝蝕斷斷數典煩吾  
儒太學儀文此其躅仰視光燄翔寰區

日夕

坐久日將沈閒庭物外心蟬聲寫秋思山氣停夕陰天自  
移寒暑人誰覺古今薄縣新怯冷露下薜蘿襟

山中長夏

長夏山中靜翛然真所思峯多收日早窗曲得風遲汲水  
烹新茗研硃點舊詩北窗高臥意爲報好禽知

日午

日午炊煙細忘機坐竹樓雲歸山勢動風急鳥聲浮采藥  
行將老聞歌意自由柴桑真澹宕難與俗情謀

茆屋

山中多歲月嘯詠快林泉花氣曛晨酌松濤枕夜眠素心  
原澹若生理固陶然茆屋無些事平張古調絃

早發兗州

南征迂轡至東郡數程行城月叢祠影樓鐘古殿聲漸看  
齊魯接欲挹濟淮清旅邸恩恩迫踟躇無限情

舊履

雙雙絲履做取著已多時知爾無他錯憐余少所歧侯門  
遙莫卽書肆近堪宜尙有還鄉約音希喜護持

秋江

屈曲江干路行行一徑斜沙頭眠乳鴨牛背坐寒鴉觀釣  
心逾澹看雲興轉賒松門參伍處隨步入山家

上巳前一日同人集汪劍鐔先生處

乾坤滿目復經年潦倒儒冠悵遠天佳趣乍生春草後閒

愁都落野鷗前一觴一詠聊如此同世同官亦偶然杯底  
流光休錯料他時風雨竟無邊

燕臺

從古風雲此地多黃金臺畔意如何千秋駿骨同珍惜異  
代高名一嘯歌露布北馳思擊筑攜槍西指憤提戈至  
尊猶抱平成慮誰與蒼生出坎軻

讀史書事

廿年驕貴擁塵埃百萬生靈養禍胎  
鼠自貪中日是妖狐多占暮雲隈  
可憐嚴譴從天降不盡歡呼動地來  
獨有私人猶掩涕三春無夜弗驚雷

熱河道中

神區繇巨氣彌尊不盡堯封竊薊門古北星河懸絕塞天  
南風日近中原山盤錘挺千峯銳水匯灤河百折渾歲歲  
大軍頻駐輦盧龍無事樂諸屯

清明前一日

沈沈風日近清明客久思家顧影驚望隔松楸誰酌酒坐  
當庭院怕聞鶯長歌浩蕩心同迴短褐栖遲跡未成兩見  
至尊春謁寢何人不起故園情

春燕

年來年去擲流光水榭雲亭合斷腸何日江泥拋戔已誰  
家棟宇尙齊梁將完補綴畱探院不惜翻飛溼野塘曾識  
主人多愛惜怕教毛羽逐風狂

寄友人

驚心歲月擲流梭未許文章老薜蘿湘浦春雲猶昨夢洞庭秋水又新波獨愁今古橫胸大入醉乾坤放眼多料得年來消息好瓣香同與問池荷

寄周四湘屏

今年牢落更無倫書劍相隨只自親獨立蒼茫曾是伴自時在詩盡消疏塊酒爲鄰天邊猿獼愁遊客自止時有池友人入蜀上芙蓉戀故人兩次開君靈麓宇瀟湘雲樹案頭春

題邑中石壁潭

西風斜日吼鯨鐘驚起人閒欲臥龍水月盈虛中自主湖山開拓久誰封秋空天放橫江鶴崖裂寒淒泣露蛩南下

洞庭流派合洪濤鼓枻更奇蹤

黃昏卽事

松青菊黃霜葉丹挂杖獨倚斜陽看西風半笛客無語南  
雁一聲山欲寒所思忽見蒼葭岸何時共把珊瑚竿滄浪  
日暮水深淺無使巨鼇翻波瀾

獨酌

亭皋木盡脫霜霰眼前新借此杯中物回余肺腑春

獨吟

偶有會意處便與筆墨俱自彈希世曲嬾得費工夫

君山松

柯磔蟠雲異樣形森然勢欲拔滄溟青蒼未可量年歲留

與名山護鶴翎

寄信囑家人種竹

參差短徑短籬開  
整整斜斜閒古梅  
舊有根株須擁護  
看  
他新筍出牆來

沈湘書集卷第一百七終